

■ CONVIVENZA

Da nazis e socialromantichers

DA VIOLA PFEIFFER*

Idat ina fitg buna metoda per perder la fidanza en l'umanitad: leger online ils commentaris tar artitgels da gassetta. Cun preferenza natiralmain quels cun tematicas sco fugitivs, politica sociala uffants, famiglia ed educaziun. Jau sun atgnamain da l'opiniun che la gronda part dals cartgauns n'è e sasez betg nauscha. Cun leger quests commentaris sa mussa in auter maletg.

Tenor quels sa cumpo-
na nossa societad numnadamain da 50 pertschient rassistis, 40 pertschient sexistis e 10 pertschient sanesters radicals. E quai tar ina gassetta sco il «Tages-Anzeiger» e betg tar «20 Minuten» u forsa il «Blick». Tar il «Blick» fissan las cifras probablmain 50 pertschient sexistis – tge auter tar ina gassetta cun ina dunna blutta sin il frontispizi – 47 pertschient rassistis e 3 pertschient sanesters radicals – e lezs era mo per che tschels 97 pertschient hajan insatgi da sa vilentar.

Ils commentaris èn per il solit fitg primitiv, perfin sin paginas che na publitzesch betg mintga pulenta. Schurnalistas e politicras valan per se sco incompetentas, fugitivs èn adina mo fugitivs economics e mitschafadias e glied ch'è d'in auter avis vegn titulada tut tenor gust e luna u sco nazi u socialromanticher. Mintga giada cura che jau legel tals commentaris ma grittentesch jau e less sbragir en fatscha a l'entira umanitad: «Tge tgutgaria primitiva! Vus essas disgustus! Simplamain disgustus!»



Cler, ins pudess geadir: «Ti na stos gea betg leger quels commentaris!» Ma i porscha ina tscherta fascinaziun, ina fascinaziun sumeglianta a Hartz-4-TV la mesemna suentermezdi sin RTL 2. Là ves'ins dunnas che fan guerra ina cun l'autra per via da l'educaziun da lur uffants, umens che tschertgan dunnas cun metodos anc pli dubitavlas che las metodos d'educaziun da tschellas e teenies che survegnan pops. La chaussa è garnida cun sex, cugliunims, amur e quozients d'intelligenza che correspundan en media a quel d'in toc paun.

Ina fascinaziun sumeglianta hai jau cun m'imaginar l'autur da commentaris asocials: el è in pauper um grass e frustrà che sesa davant il computer cun sia biera e ses kebab e legia artitgels, e durant che la sosa da sia tschavera dagutta sin ses chamischut alv titulescha el online Jolanda Spiess-Hegglin ina schlampra incompetenta.

Tar la glied ch'ins vesasa la mesemna suentermezdi sin RTL 2 sa tracti da cas spezial, freaks ed excepziuns. In pau sco en in museum da curiositads. Ma l'um che sesa sulet davant ses computer n'è betg uschia ina

curiositad. La spira massadals commentaris rassistis e sexistis fa l'impresion ch'ina gronda part da la populaziun pensa uschia.

Dentant èsi enconuschent che mo ina fitg pitschna part dals lecturs commentescha ils artitgels ch'els legian, ed il pli savens vegnan commentads artitgels che propageschan in'autra opiniun che l'atgna. Per far l'emprova hai jau consultà las versiuns online da mias columnas. E guarda qua – nagins commentaris. Sa sche lecturs rumantschs, gea il mund rumantsch, è simplamain inexistent? U – e quai fiss la segunda interpretaziun da la spira mancanza da commentaris – vus essas simplamain tuts adina da mia opiniun.

* **Viola Pfeiffer** studedia germanistica, istorgia e rumantsch a l'Universitad da Turitg. Mintgatant lavura ella per la «Südostschweiz», mintgatant per il «Teletext» e mintgatant sco scolasta, ma bunamain adina scriva ella.

Vocabulari

fidanza –	Vertrauen
fugitiv –	Flüchtling
sanester radical –	radikaler Linker
dunna blutta –	nackte Frau
frontispizi –	hier: Frontseite
sa vilentar –	sich aufregen
per il solit –	für gewöhnlich
mitschafadia –	Schmarotzer
sbragir –	schreien, brüllen
umanitad –	Menschheit
tgutgaria –	Unsinn, Dummheit
disgustus –	widerlich
dubitaivel –	zweifelhaft
cugliunim –	Betrügerei
biera –	Bier
tschavera –	Essen, Mahlzeit
daguttar –	tropfen
chamischut –	Leibchen, Unterhemd
schlampra –	Schlampe

Unterstützt von der Lia Rumantscha



Lia Rumantscha